



Minggu, 20 Juni 2021
Ogen: Jeremia 29: 10-14



Kuperdiateken Nge Kam



Allah tidak menjanjikan perjalanan yang tenang tetapi pendaratan yang aman. Kalimat bijak enda ngingetken kita proses penerbangan pesawat terbang. Bicara kita bas pesawat e, tangtangna kabang e bagepe sangana i datas e nterem nge kalak nggejapken kinilatenangen. Terlebih adi cuaca buruk, lit goncangen si la biasa terjadi. Perasaan pe mulai la sedap, lit kebiaren, lit kearun ate bahkan kepaniken. Lanai kita sabar mendarat pesawat terbang si i datasi kita e, gelah adi nggo seh i bandara banci bernafas lega. I bas proses perdalinen kegeluhen Bangsa Israel i taneh perkawanan Babil pe nggejapken kesusahen si mesangat, sebab ia ringan itengah-tengah bangsa si la nandai Dibata si isembahna. Amin gia perintah Dibata gelah ia erdahin, ertoto, nuani juma, erjabu, mbangun rumahna sedekah pitu puluh tahun i Babil tapi labo lit kepuasen si igejapkenna sabap ia labo ringan i bas kutana. Kegeluhen segedang-gedang wari igombangi bangsa si i sekelewetna si la nandai Tuhan si isembahna. Sabap pemahamen asum si e adi bangsa e talu berarti dibata si isembahna pe talu. I bas proses perdalinen kegeluhenta mon 'gerupuh' nge sigejapken. I jah i je jadi perbeben geluhta. La erngadi-ngadi si akap, tempa la lit si teneng-tenengna. Erbera ukurta kerna pengkawali dengen penemani Tuhan asum mesangat perbebenta e. Padahal adi nggit kita ndalanisa alu erpengendes man Tuhan, sialoken ketenengen. Enggo pernah nge kita pulah arah kiniseran, enggo nge gejapken kita pulah arah perbeben. Payo, asum mesangat perbeben e banci turah kebiaren, aru ate bahkan kepaniken. Seh kari waktuna, sai perbebenta e sialoken me kemalemen ate ije me maka ngaku kita waktu Tuhan adalah yang terbaik. Sabap nina Tuhan "seh kari waktuna, kuperdiateken nge kam" (ay. 11), alu bage perlu kesabaren i bas nimai waktu Tuhan, la pernah kita itadingkenNa ngalaken perbebenta, emaka kita pe ula ka sitadingken Tuhan i bas ngalaken erbage perbeben geluhta. Nina Tuhan "kuperdiateken nge kam" adi Tuhan si mada kegeluhen e si ngatakan ku perdiateken nge kam lanai lit alasenta mbiar ndalani kegeluhenta, dahiken asa ngasupta, sikerajangen Tuhan idungiNa.